

## «Ir cun skis ella Péra ei bi»

Sin quest unviern ei il runal La Péra a Trun/Campliun vegnius sanaus da rudien. Dapi l'avertura miez december attira il territori da skis – pign mo fin – in tschuat hosps da lunsch e da maneivel. La Péra ei in liug ideal per entscheviders e famiglias. Questa jamna gaudan ils scolarets dil Consorzi da scola Sumvitg-Trun (mira foto sutvart) leu ina jamna da scola da skis. Duront la viseta dalla FMR han las buobas ed ils buobs raquintau da lur aventuras e manegiau: «Ir cun skis ella Péra ei bi.» (fmr/sr) **Pagina 7**

# La Péra – in liug ideal per emprender dad ir cun skis

Quest'jamna han ils affons da scoletta dil Consorzi da scola Sumvitg-Trun gudiu la scola da skis comunabla a Trun/Campliun. Il territori da skis dil runal La Péra – ch'ei vegnius modernisau sin quest unviern – ei in pign paradis da skis per affons e lur famiglias.

SUSI ROTHMUND/FMR

La mesjamna ei stau ina pulita truscha tier il runal La Péra. Quei di han las scolas liber e biars van cun amitgas ed amitgs cun skis «ella Péra», sco ils da Trun dian. Sco avon rodund tschun decennis ei quei aunc adina in liug da sentupada per affons. Quels in tec pli gronds san ir persuls ni en gruppas ed ils pli pigns vegnan accumpignai da babs e mummas. In bien liug da sentupada ei l'ustria Refugi e leu spe-tgan ils carschi che han buc gest gust dad ir sin pista en «stiva» caulda sils juniors.

### In pign, mo bi territori

«Igl ei in fetg bi territori, jeu sun perfin s'annunziada voluntarmein da dar scola da skis cheu. Las pistas ein buca teissas, persuenter ladas ed igl ei surveseivel, aschia sa negin ir a piarder», ha *Caroline Bläsi* detg. Ella ei ina dallas tschun scolastas e scolasts dalla scola da skis da Breil ch'ei stai a Campliun quels dis. Ils 31

**«Las pistas ein buca teissas, persuenter ladas ed igl ei surveseivel, aschia sa negin ir a piarder»**

Caroline Bläsi, scolasta da skis

bein in cun l'auter, ir cun skis sappien ils biars gia dètg flot.

plascher da far slalom. Insumma, als pigns plai ei ella Péra ed ei han raquintau da lur pistas specialas cun mums sco pista da morts, da zombies e lu detti ei aunc ina nova da tschugalata. Daco che quella hagi num aschia astgien ei tradir pér oz, alla fin dall'jamna da skis. Duront ch'ils pigns marendavan e raquintavan mavan buobs empau pli gronds sperasvi cun palas si dies. Els han baghegiu segls.

### Pils proxims 25 – 50 onns

Era *Bruno Pfister* da Schlans fuva la mesjamna a Campliun sin pista cun ses affons. El ei ella suprastanza dalla Runal Péra SA. Sco um dil fatg, che lavura dapi biars onns ella branscha da pendicularas en Svizra ed egl exteriur eis el staus responsabels pil project da sanaziun dil runal La Péra. «Igl ei stau fetg intèressant per mei, aschia hai jeu era ina ga viu co tut sesplei-ga ord l'optica dil client. Secapescha drova ei dapli da realisar ina gronda pendiculara, mo era per in pign runal eis ei da mirar per lubient-schas e da reglar in tschuat formalitads», ma-

affons da scoletta han ei partiu en gruppas tenor habilitad. Dils scolarets dil Consorzi da scola Sumvitg-Trun eran sulet dus entscheviders, mo era quels han spert giu ora il tric. Sco las mussadras *Regula Giger e Rita Tiri* dian, ei la finamira ch'ils affons emprendien dad ir cul runal e da prender risguard in sin l'auter era sin pista. Ils affons da differents vitgs duegien semplamein haver in bien temps e vegnir ora

### Pistas da morts e perfin da tschugalata

Cun vestas cotschnas mavan ils pigns si e giu tgei ch'ei pudevan e la mesjamna ein ei serimnai si Cumadé per guder ina buna marena offerida dallas mussadras. Cun egl tarlischonts han ei raquintau da lur aventuras. Sco *Luca* ha tradiu, han ei perfin astgau ir anavos entochen giudem e saltar walzer culs skis. *Giulia* va gia dapi treis onns cun skis e la buobetta ha schau

negia Bruno Pfister. Tuts involvai seigien denton segidai e hagian purschiu maun aschia ch'ei hagian saviu entscheiver a far las lavurs da fundaments da betun miez october. Las installaziuns mecanicas han pudiu vegnir fatgas naven da miez november. Grazia al sustegn da numerus sponsurs ei la sanaziun ton sco finanziada. «Jeu sun aunc vid pagar ils davos quens. Ils custos finals muntan a rodond 470 000 – 500 000 francs.» Sissum e giudem ei tut niev, sugas e giuvs ein medemamein novs ed igl ei vegniu montau ina pèta supplementara. «Ussa speirein nus da saver mantener il menaschi dil runal pils proxims 50 onns», ha Bruno Pfister declarau riend.

### Massa hosps

Dapi l'avertura ils 17 da december ha La Péra giu aviari, cun excepziun da dus, treis dis nua ch'ei ha pluviu. Tenor Bruno Pfister ha tut la publicitad per encurir sponsurs giu in effect positiv supplementar: «A mi ei curdau en egl ch'ei ha dapli gliued che nezegia nies runal. Se-capescha ils indigens, mo era hosps ch'ei vegni extra per ir cun skis si da Cuera ni giu da Sedrun.» Il runal ei aviarts tenor igl urari da scola. Cu ils affons han vacanzas ni liber han ei la pusseivladad dad ir sin pista. Ils prezis per cartas da miez ni gl'entir di ein mudests ed ein dapi onns buca pli vegni alzai. Atgnamein haveva la Runal Péra SA quintau d'organisar ina fiasta d'inauguraziun. Muort las restricziuns ha quella denton stuiu vegnir spustada sin l'auter unviern. «Nus levan che tut tgi che vul sappi prender part e perquei havein deciduu da stuschar nossa fiasta. Aschia festivein l'auter unviern gest dublamein, lu ha La Péra numnadamein 50 onns.»



Sin quest unviern ei il runal La Péra vegnius sanaus ed ei ton sco novs.

FOTOS SUSI ROTHMUND



Bruno Pfister ei ella suprastonza dalla Runal Péra SA e savens d'entupar sin pista. Cheu muossa el a sia feglia Elena dad ir cun skis.